

শুকনামের উপদেশের মধ্যে রাজার যে রাজকীয় জীবনের চিত্র ফুটে উঠেছে — তা আলোচনা করো।

উত্তর মহাকবি বাণভট্ট সংস্কৃত গদ্যকাব্যের দরবারে রাজাধিরাজ। তাঁর অমর রচনা কাদম্বরী নামক কথাকাব্যের শুকনাসোপদেশঃ শীর্ষক অংশে গদ্য রচনার সকল বৈশিষ্ট্য প্রস্ফুটিত হয়েছে। তিনি স্বীয় প্রতিভার জাদুস্পর্শে ভাষাকে সঞ্জীবিত করেছেন। পাঠ্যাংশে লক্ষ্মীর একটি বাস্তবধর্মী রূপ পাঠকের সামনে তুলে ধরেছেন। উজ্জয়িনীর রাজা তারাপীড়। তাঁর পুত্র চন্দ্রাপীড়। রাজার পরম বিজ্ঞ মন্ত্রী হলেন শুকনাস। রাজপুত্র চন্দ্রাপীড় গুরুগৃহে থেকে বিদ্যার্জন শেষ করে বাড়ি ফিরে এলে পিতা তারাপীড় তাঁকে যৌবরাজ্যে অভিষিক্ত করতে ইচ্ছুক হলেন। অভিষেকের আগে চন্দ্রাপীড় পিতৃপ্রতিম সচিবশ্রেষ্ঠ পণ্ডিত শুকনাসের সঙ্গে দেখা করতে এলে তিনি চন্দ্রাপীড়কে অত্যন্ত সমুচিত কিছু উপদেশ দান করেন, যাতে চন্দ্রাপীড় একজন যথার্থ প্রজানুরঞ্জক রাজা হয়ে উঠতে পারেন।

পণ্ডিতপ্রবর শুকনাস শুরুতেই উপদেশ দানের প্রয়োজনীয়তা সম্বন্ধে বলতে গিয়ে বলেন — ধনসম্পত্তি, প্রভুত্ব শক্তি এবং যৌবন মানুষকে বিবেকবর্জিত করে তার জীবনকে দুর্বিষহ করে তোলে। যদিও রাজপুত্র চন্দ্রাপীড় সর্বশাস্ত্রজ্ঞ ও ধীর, তবুও তার সতর্ক হওয়া প্রয়োজন। নতুন যৌবন, অনুপম সৌন্দর্য, অসাধারণ শক্তি ও জন্মের

পরই যে প্রভুত্ব — প্রত্যেকটি ভয়ংকর। আবার এই তিনটি যদি একসঙ্গে একজনের মধ্যে আবির্ভূত হয় তবে তো আর কথাই নেই। কারণ শাস্ত্রজ্ঞান থাকলেও যৌবনে বুদ্ধি কলুষিত হয়। আর একবার বিষয়বৈভবের স্বাদ পেলে হৃদয়ে আর কোনো উপদেশ প্রবেশ করে না। চন্দ্রাপীড়ের এখনও বিষয়ের নেশা জমেনি। তাই এসময়ই তার উপদেশ লাভের উপযুক্ত সময়।

সদ্বংশে জন্ম অথবা শাস্ত্রজ্ঞান দুষ্প্রবৃত্তিকে দমাতে পারে না। কারণ শীতল সমুদ্র জলেও বড়বানল জ্বলে ওঠে। গুরুর উপদেশ, মানুষের সব নোংরা পরিষ্কাররূপ জলহীন স্নান, জরাহীন বার্ধক্য এবং উদ্বেগহীন জীবন। রাজাদের পক্ষে এইরূপ উপদেশের খুবই প্রয়োজন আছে, কিন্তু কেউ সাহস করে উপদেশ দেয় না। কারণ ধনরত্ন ও নানা সুবিধা পাওয়ার আশায় সকলেই প্রায় রাজার তোষামোদ করে থাকে।

আদর্শ রাজার সর্বপ্রথম কাজ হল রাজলক্ষ্মীর কুৎসিত রীতিনীতির প্রতি সজাগ দৃষ্টি রাখা। অত্যন্ত চঞ্চল স্বভাবের লক্ষ্মীকে অনেক কষ্টে লাভ করতে হয় এবং বহু যত্নে একে পালন করতে হয়। এই লক্ষ্মী যেন নিষ্ঠুরতা শিক্ষা করার জন্য বীর যোদ্ধাদের তরবারির ধারে বাস করে। সমুদ্রমন্থনকালে একসঙ্গে ক্ষীর সমুদ্র থেকে উঠেছিল লক্ষ্মী, পারিজাত, চন্দ্র, কালকূট বিষ, কৌস্তভমণি প্রভৃতি। এইসব বস্তুর একত্রে অবস্থানহেতু লক্ষ্মী পারিজাত থেকে অনুরাগ, চাঁদের কাছ থেকে বক্রতা, উচ্চৈশ্বর্যের কাছ থেকে চাঞ্চল্য, কালকূট বিষের কাছ থেকে মোহনশক্তি, মদ্যের কাছ থেকে মাদকতা, কৌস্তভমণির কাছ থেকে নিষ্ঠুরতা সঙ্গে নিয়েই যেন আবির্ভূত হয়েছিল।

এই লক্ষ্মী নীচ প্রকৃতির। শত চেষ্টা করেও একে চিরদিন বেঁধে রাখা যায় না। লক্ষ্মী কোনো লোককেই আদর করে না। কুলের প্রতি দৃষ্টিপাত করে না, রূপ দেখে না, কুলক্রমের অনুসরণ করে না, স্বভাবের প্রতি লক্ষ রাখে না, দক্ষতার আদর করে না, শাস্ত্রজ্ঞান শুনতে চায় না, ধর্মের মর্যাদা রাখে না, দানশক্তির আদর করে না, বিশেষ অভিজ্ঞতার বিচার করে না, আচার মানে না, সত্য বোঝে না, শুভ লক্ষণকে অনুসরণ করে না, মেঘের গন্ধর্বনগর রেখার মতো দেখতে দেখতেই অদৃশ্য হয়ে যায়। বিষ্ণুর প্রিয়া হয়েও অসৎ ব্যক্তিকে আশ্রয় করে। সবসময় এক রাজাকে ছেড়ে অন্য রাজাকে আশ্রয় করে। এর স্বভাব গঙ্গার মতো চঞ্চলা, অন্ধকার গুহার মতো তমোগুণযুক্ত, আর বিদ্যুতের মতো অল্পস্থায়ী।

এই লক্ষ্মী ইন্দ্রজাল দেখাতে দেখাতে যেন এই পৃথিবীতে পরস্পর বিরুদ্ধধর্ম সমন্বিত নিজের চরিত্র প্রকাশ করে। অমৃতের সহোদরা হয়েও বিষতুল্যা, সম্পদের অহংকারে গরম করেও জড়তা আনে, উন্নতি ঘটিয়েও নীচতা জন্মায়, শিব হয়েও অশিব স্বভাব বিস্তার করে, বলবৃদ্ধি ঘটিয়েও স্বভাবকে লঘু বা চপল করে, যেখানে যত বেশি লক্ষ্মীর আবির্ভাব, সেখানে তত বেশি কুকীর্তি বিরাজ করে। এর সাহায্যে মানুষের সমস্ত মহৎ গুণ নষ্ট হয়ে যায়। মোহ এসে আশ্রয় নেয়।

এই দুরাচারিণী লক্ষ্মীর প্রভাবে রাজাদের চিত্ত কলুষিত হয়, তাঁদের বুদ্ধিভ্রংশ ঘটে। তাঁদের সমস্ত মহৎ গুণগুলি বিনষ্ট হয়। ফলে তাঁদের চালচলন, আচার-ব্যবহার অন্য রকমের হয়। কেউ সম্পদের মোহে বিহ্বল হয়ে যান। কেউ মদনশরে মর্মাহত হয়ে নানা মুখভঙ্গি করেন, কেউ ধনমদে মত্ত হয়ে নানা ভাবভঙ্গি করেন, কেউ-বা নিজের অঞ্জের ভার বহিতে না-পেরে পঞ্জুর মতো অপরের সহায়তায় চলাফেরা করেন, সামনের বন্ধুকে চিনতে পারেন না। তাঁরা নিজেদের পরিণাম বুঝতে পারেন না। মহামন্ত্র পাঠেও তাঁদের চৈতন্যোদয় হয় না। লক্ষ্মীর প্রভাবে নানা কুকর্মে লিপ্ত থেকে দিনের পর দিন মৃত্যুমুখে পতিত হন। তাই শুকনাস চন্দ্রাপীড়কে লক্ষ্মীর স্বভাব ও ঔদ্ভত্য সম্বন্ধে বারবার সাবধান করে দিয়েছেন।

পণ্ডিতপ্রবর মন্ত্রী শুকনাস চন্দ্রাপীড়কে দুরাচারিণী লক্ষ্মীর কুপ্রভাবের কথা বলার পর ধূর্তদের কথা বলেছেন। এইসব স্বার্থপর, আত্মকেন্দ্রীক, ধনরূপ মাংসখেকো শকুনের মতো ধূর্তেরা পদ্বমধ্যে বকের মতো রাজসভায় থেকে রাজাদের দোষগুলিকে গুণ বলে প্রতিপন্ন করে নিজেদের সুবিধা আদায় করে। তারা রাজাদের বোঝায় — পাশাখেলা তো আমোদ, মৃগয়া ব্যায়াম, মদ্যপান বিলাসিতা, প্রমত্ততা হল বীরত্ব, স্বেচ্ছাচারিতা হল প্রভুত্ব, চঞ্চলতা হল উৎসাহ, নিজ-স্বী পরিত্যাগ হল অনাসক্তি, গুরুর উপদেশ অমান্য করা হল পরের অধীনতা অস্বীকার করা, নৃত্য-গীত-বাদ্য ও বেশ্যাতে আসক্তি হল রসিকতা, গুরুর অপরাধ শূনেও প্রতিকার না-করা হল মহানুভবতা,

অপমান সহ্য করা হল ক্ষমাগুণ, দেবতাকে অপমান করা নিজের মহাশক্তির প্রকাশ — এইভাবে নিজেদের চরিত্রের সমস্ত দোষগুলিকে গুণরূপে স্তাবকদের বা চাটুকারদের মুখে শুনতে শুনতে রাজারা নিজেদের মহান বলে মনে করেন।

এমনিতেই রাজারা ধনমদমত্ত, উন্মার্গগামী প্রায়, তার উপর ধূর্তদের মিথ্যা স্তবস্তুতি তাঁদের বুদ্ধিভ্রষ্ট করে তোলে। ফলে রাজন্যবর্গ নিজেদের ঈশ্বরের অবতার, অতিমানব ও তাঁদের মধ্যে দেবতা বাস করেন — এইরূপ ভেবে দেবতার মতো নানা কাজ করতে গিয়ে লোকেদের উপহাসের পাত্র হন। তাঁরা মনে করেন তাঁরা সকলেই স্বয়ং চতুর্ভুজ নারায়ণ, শিবের মতো তাঁদের ললাটেও তৃতীয় নয়ন আছে। এইভাবে মিথ্যা আত্মমহিমায় স্ফীত হয়ে অন্যের সঙ্গে মেশা তো দূরের কথা, কারও প্রতি দৃষ্টিপাত করাও যেন বরদান বলে মনে করেন। অন্যকে স্পর্শ করলে ভাবেন তাকে পবিত্র করে দিলেন।

মিথ্যা মাহাত্ম্যের অহংকারে পরিপূর্ণ হয়ে রাজারা দেবতাদের প্রণাম করেন না, ব্রাহ্মণদের পূজা করেন না, মান্য ব্যক্তিদের সম্মান করেন না, পূজনীয়দের পূজা করেন না, গুরুজনদের সম্মানে উঠে দাঁড়ান না, বিদ্বানেরা অনর্থক পরিশ্রমে নিজেদের বিষয় ভোগসুখ থেকে বঞ্চিত করেছেন বলে তাঁদের উপহাস করেন, অভিজ্ঞ বৃদ্ধের উপদেশকে প্রলাপ বলেন। মন্ত্রীদের উপদেশে তাঁরা বিরক্ত হন, শূভার্থীর কথায় তাঁদের রাগ হয়। এঁরা সন্তুষ্ট হন সেইসব লোকেদের প্রতি, যারা নিষ্কর্মার মতো কাছে বসে থেকে দিনরাত করজোড়ে ইস্টদেবতার সেইসব রাজাদের স্তবস্তুতি করে। ফলে রাজারা শুধু তাদের কথাই বলেন, ভাবেন এবং সমস্ত সুযোগসুবিধা দান করেন। যৌবরাজ্যে অভিষেকের আগে উপযুক্ত সময়ে যথার্থ হিতৈষী পিতৃসম পণ্ডিতপ্রবর শুকনাস এইভাবে অত্যন্ত সমুচিত উপদেশ দান করলেন, যেহেতু উপদেশের পাত্রও যেমন দুর্লভ, তার চেয়েও বেশি শোচনীয় গুণবানের স্থলন।